

漢書門類
二〇六三
一三九三
一三五
五八五
冊架函號類

內閣文庫
漢書類
一五三
二八六
三九
冊架函號類

內閣文庫
番號 漢 2063
冊數 335 (436)
函號 339 138

總經
十二
四



宋鄭節鄉先生著

太平經國之書

通志堂藏板

太平經國之書序

大中大夫山西左參政後學祥符高叔嗣譔

正德十四年余以增廣生被試策問周禮疑信相半

之由余方少竊聞其槩因以意對曰昔孔子之時周

德方衰而對魯哀公以文武之政布在方策人存政

舉之說及周益衰孟軻氏始言諸侯去先王之籍不


得聞其詳彼所稱方冊與籍豈謂周禮邪孔子尚思

興東周孟子則直勸齊梁以王當是時不但其籍亡

雖有之固不可為邪至荀卿之徒李斯佐秦遂取經

籍一切焚棄之後世以為臯然使始王并天下為周

武王李斯有周公之聖其時欲行周禮能乎周之興



通志堂藏板

通志堂

也深仁厚澤垂十餘世聖后繼作禮樂法度莫不講明國以爲教家以爲學漸被陶融非一日也故周立爲天子頒其政式放於四海靡然信從事若畫一不俟強勉其來遠矣秦則不然以戰鬪爲功以干戈爲業法令已成習俗已定方其烹滅諸侯而六合爲一也雖有周禮將安施之而況後秦者乎何也先王之法至周始備至秦始滅去此其會也後世直用秦爲古耳秦不復行周禮明後世之不可行必矣然則是書可盡廢邪何爲其然也三禮莫古於儀周公所親定者說文云禮之字從豆從曲從示示古神祇字蓋先王於邊豆神祇之間曲盡其意於是乎錄其升降

等其隆殺故謂之禮此其跡也先王之意有不在是者周易觀之彖曰盥而不薦有孚顒若先王以其誠敬之心事神故下觀而化故傳曰聖人以神道設教而天下服矣今夫官名之設內外之辨崇卑之度多寡之數成周致治之具也而所以致治豈盡於是邪故善爲治者師其意而已若周禮者存之以考可也其略云耳是時南原王先生督學優之其年叔嗣舉於鄉後三年得進士爲考功主事始好是書聞人有異本不憚求之同縣人按察副使田勤甫氏刊周禮集說讀其中往往引太平經國書可觀取恨不見其全他日翰林學士姚維東氏云有之傳以眎叔嗣錄

藏於家後十年而為嘉靖丙申上冬朔日刊於山西布政司

太平經國之書序

修職郎衢州府學教授永嘉鄭伯謙節卿撰

先王無自私之心安家者所以寧天下也存我者所以厚蒼生也三代以還人主始自私矣以天下遺其子孫故不得不為久恃無恐之計然天下猶因其自私之心而獲少安於其間至於秦隋魏晉南北之君淫荒狂惑則併與其自私之計而弗念矣夫有天下而至於不愛己固無望其愛民矣而獨惜夫愛己者之所以及民亦褊迫淺陋足以躋時於小康而不足以憑藉維持於無窮也三代聖人之紀綱法度憲章文物所以本諸身而布諸天下者甚設也而尤周密



詳備於成王周公之時彼其處心積慮上徹乎堯舜
 下及乎萬世者也外不懼天下之謗而私其跡曰必
 使我子孫相承而宗祀不絕也內實達天下之道而
 公其心曰必使我君臣相安而禍患不作也是故兼
 三王施四事夜以繼日盡吾精神心術而為之其兵
 農以井田其取民以什一其教民以鄉遂其養士以
 學校其建官以三百六十其治天下以封建其威民
 以肉刑大本既立然後其品節條目日夜講求而增
 益之其上則六典八法八則九柄九貢九賦九式之
 序其次則祭祀朝覲冠昏喪紀師田行役之詳下至
 於車粧圭璧之器梓匠輪輿之度與夫畫績刮摩埴

埴之法又其細者則及於登魚取龍擗鼈之微畢公
 所謂克勤小物者周公尤盡心焉蓋一而再三申復
 之貽謀燕翼後世豈無辟王而皆賴前哲以免流彘
 之難共和攝政而天下復如故龍漿作孽宗周滅矣
 猶能挾鼎壘而東當戰國之相吞噬周塊然而處其
 中天下猶百餘年而宗主之至於垂亡臨絕之際自
 分而為東西其子孫益繆戾乖忤而弗念厥紹故天
 下始去周而為秦法亡則周亡天下後世苟有下泉
 之思治匪風之思周道則陳淫檜亂之極一變而復
 見豳風之正聖人序詩所以寓其意於十五國風之
 末也秦人變古不道不足深恨漢氏去三代甚近而

去周爲尤近不能因其自私之心而講求周公致太平之迹惴惴然徒惟得失之重而操心之危苦智慮而盡防範大抵不過爲握持天下之術耳苟簡目前非能深長之思經久之慮也封君古也止於行推恩之令井田古也止於議名田之法刑法止於定箠令軍旅止於京師之南北軍郡國之都尉建官則倣秦舊制禮則雜秦儀學校則隸太常而選舉則數路鄉里則煙火萬里其淺近功利已略足以隨世而及民矣然乍安而忽危幾亡而僅存終不足以垂裕而傳後其當世敏秀竒傑之士深見遠識而有志於先王之治者則或請定經制或欲退而更化或願建萬世

之長策每觀王符論漢家失業之民歲至三十萬則田賦鄉里刑法等制益知其苟然而已仲長統欲定吏祿重三公之權改税法更官制沛然思惟善道而有易亂爲治之意論甚美矣至於請廢封建復井田肉刑亦復講之未精也唐承八代之衰太宗之所以造唐者亦慨然欲庶幾先王之治而補漢氏之缺收召豪傑相與修廢起墜於正觀一二十年間稅爲租庸調田爲口分世業兵爲府選士爲明經進士官爲七百三十負天下爲襲封刺史然亦駁雜而不純粹疏略而無統紀未幾兼并不禁課役不均更租調爲兩稅變府兵而爲彍騎傳世襲而爲州縣不愛名器

而為墨勅斜封唐之子孫固非善守法者而立法之初亦不得不分任其咎當其弊端未見天下因其自私而亦得以獲苟安之利一旦利盡害形罅隙呈露則遂以大壞而不得支持矣宋之元嘉元魏之秦和隋之開皇仁壽夫豈不為治安而言治者不之數功利在人及身而止漢唐之事何以異此雖然漢承亡秦絕學之後不獨二帝三王之法度無復餘脉雖五霸七雄區區富強之事亦一掃而無遺草創之初大臣無學方用秦吏治秦律令圖書固難責以先王之制度也唐自元魏北齊以來受民以田分民以鄉先王之制十已用其一二繼以蘇綽之在周約六典以

定官制而府兵之法亦微有端緒先王之制十已用其五六又繼以隋文帝之富盛蘇威高景本頰字之損益而先王之制十已用其七八太宗躡其後而行之使其深觀詳酌纖悉委曲有以補前世之未備則以唐之治為周之治日月可冀也而僅以若此此豈無所自哉世變不古功利之蟠結於人心而此書之宏博浩翰讀之難曉而說之易惑也彼其煨燼於秦火貶駁於漢儒好古如武帝反謂之末世瀆亂不驗之書伏藏泯沒於山巖屋壁之間漢之末年雖入秘府竟未嘗一出而試之於治其後劉歆取以輔王莽五均六幹列肆里區皆有征天下騷然受其弊其餘



杜氏不過能通其句讀馬鄭諸儒亦止於作為訓詁而已隋唐之間文中子講道河汾頗深識其本末以為經制大備後世有所持循然徒載之空言不及見之行事也唐太宗嘗與羣臣語及周禮而房杜魏徵雖出王氏之門然本無素業留宿中書聚議數日竟不能定問及禮樂復不能對大本既失他何望焉宋朝王氏以儒學起相熙豐又嘗一用周禮而計利太早求民太甚其禍甚於劉歆伊洛老師橫渠張夫子固習周公者矣而又不及究其志蓋自有周禮以來若孔子文中子及伊洛橫渠諸子則恨不及用房玄齡杜如晦魏徵則愧不能用漢之劉氏宋朝之王氏

則又悔不善用自漢唐以至今日天下之治所以駁雜而難考弊壞而不可收者大抵出於是三者之間也是以時君世主厭薄儒生媵笑王制悉意於淺功近利就其自私之心而姑為是目前苟簡之謀儻可以維持一世足矣不暇及此宏闊之談也嗟乎千載之下有能起周公之治者學者所不能而見也有能講明周公之制者學者所不能而辭也



太平經國之書目錄

卷首

成周官制圖

秦漢官制圖

漢官制圖

漢南北軍圖

第一卷

教化

奉天

省官

內治

官吏

宰相

第二卷

官民

官刑

攬權

第三卷

養民

稅賦

節財

第四卷

保治

考課

第五卷

賓祭

相體

第六卷

内外上

内外下

第七卷

官制

臣職

第八卷

官民

奉養

祭饗

第九卷

愛物

醫官

鹽酒

第十卷

理財

内帑

第十一卷

會計上

會計下

内治

太平經國之書目錄

成周官制圖

燕朝

一曰内朝
小臣正之

内宰

中朝

一曰路朝
司士正之

太宰

外朝

朝士正之

太僕

夏官司馬
太僕掌之

小宰

秋官

司寇
掌之

宰夫

天官冢宰
宰夫掌之

宰夫

夏官

夏官

秋官

太平經國書圖

通志堂

小宰掌官刑以貳太宰宰夫掌朝法以貳小宰皆通
 內外之官也故太僕傳言於宰夫宰夫傳言於小宰
 小宰傳言於太宰又有內宰雖掌治王內之政令亦
 屬於太宰以此見周之宮中府中實合於一體也

秦漢官制圖 此圖俟再考

秦

尚書 四人有
今丞

少府 少府今四人在殿中
主發文書故曰尚書
漢因秦制公卿皆
因以奏事

尚書
少府

中丞
公卿

西漢

內 御史中丞 領尚書事
御史大夫
外 丞相之制
諸侯王

郡守
中二千石

朝

屬官也

朝

御史大夫丞

九卿

東漢

御史中丞

司隸校尉

將軍

京兆尹

尚書

朝中

大夫

博士

議郎

宦官

左右曹諸吏散騎

中常侍給事中以

上五項係加官也

二

一百四十六

漢官制圖

兩府

丞相

丞相司直

司隸校尉

侍御史

部刺史

御史大夫

御史中丞

繡衣御史

舊有四圖一曰宰夫之官分爲尚書中書後遂成兩
 省二曰宮正宮伯之官分爲光祿勳衛尉後遂成門
 下省三曰自膳夫至腊人凡鳥獸魚鼈烹庖之事自
 酒正至掌次凡酒漿醢醢幕帟幄次之事分入少府
 自醫師至獸師分入太常亦入少府自少府而下至
 掌皮內一項財則分入少府外一項財則分入大司
 農四曰自內宰至內師服以下凡宮中使令人分入
 於大長秋

三

漢南北軍圖

期門 並屬光

羽林 棣勳

二萬人見

武紀建

衛尉兵

元元年郡

京兆

十二城
門校尉

國財官騎

士番上以充之

中壘北

屯騎北

步兵北

越騎南

內

掌巡徼
京師即

外

中尉兵
三補之

南馬月

八

軍

兵番上以充之

軍

校

射聲北

胡騎南

長水南

虎賁北

衛將軍

文帝置後復罷之

扶風

北軍屯於宣曲池陽

郡國

有材官騎士

八校包南北軍

太平經國之書卷第一

永嘉

鄭

伯謙

節卿

教化

論六典以為民極

或問周公之敘六典也辨方正位體國經野設官分職之下每終之以為民極此特建國之始耳未見其有與於民也民何以遽取極於此哉曰先王之教天下未始有精粗本末之間也司徒一官名曰教典自今職職而考之六十官之內大抵皆分畫鄉遂整理田疇征斂財賦職掌山澤與夫市井門關之事師田行役祭祀喪紀冠昏鄉社之法而巳有如鄉大夫州長族黨之職則不過屬民讀邦法師氏保氏諫救調

通志堂

媒之職則不過掌國中得失之事其曰十二教曰三物之教曰五禮六樂之教教之條目甚設而教之官屬不詳見焉先王之教固與夫後世事文墨語言誦說傳授者不同也有如王之立朝后之居市朝之居前市之居後公卿大夫之在朝百工商賈之在市人見其爲辨方正位而已經涂之九軌而野涂之五軌宮隅之制而以爲諸侯之城制都之經涂體野涂焉諸侯之經涂體環涂焉人知其爲體國經野而已朝官居朝市官居市卿大夫王后入市則有罰二卿則公一人一卿一人由此而統六遂由此而倡九牧人知其爲設官分職而已孰知其所以定民之志而爲

教之大者固在於此邪夫朝不混市野不踰國人不侵官后不敢以奸王之權諸侯不敢以僭天子之制公卿大夫不牟商賈之利六卿九牧相屬而聽命於三公夫彼皆民上也皆富且貴焉者也而尺寸不敢踰一毫分守不敢易所以習民於尊卑等衰階級之中消其亡等冒上之心而寓其道德之意蓋孔子所謂吾無行而不與二三子者是以民服事其上而下無覬覦賤不亢貴卑不踰尊舉一世之人皆安於法度分守之內志慮不易視聽純一易直淳龐而從上之令父詔其子兄授其弟長率其屬何往而非五禮六樂三物十二教哉方位國野設官分職何往而非

以爲極哉嘗讀晉之國語每歎絳之富商民韋藩木
捷過朝之事以爲富商之饒於財使之澤其車而華
其服非不足也而必易車服於過朝之際不敢混然
與士大夫無別焉民志之定而中道之存成王周公
之遺化固隱然在此也古人教民之意深矣且不獨
周公然也康王命畢公以康四海不出於表宅里殊
井疆畫郊圻之間周公陳先公風化之由惟在於于
耜舉趾條桑載績播種稱觥之事孟子以五穀魚鼈
不可勝食與使民養生送死無憾爲王道之始韓退
之以士農工商之民父子兄弟夫婦朋友之位推而
至於宮室桑麻粟米蔬菓魚肉之物而歸之於道化

之原皆此意也後世王制不明道揆法守不立本末
源流之論不講而左右前後尊卑貴賤之際聽其相
冒而相易類聚羣分日用飲食交際文爲之間無復
有能寓吾道德之意天下之人旁觀而習見之耳目
亂而分守易乘彝者雖不泯滅而生厚者因物有遷
矣君臣之間方以因民出治爲美談開設學校置博
士弟子負下詔勸學以風勵四方以改易萬民之觀
聽儒者又從而諛之曰是有志於教化者名存而實
不至疏漏而無統紀可以善人之形而不可以善人
之心也上爲文具下爲觀美相與爲欺而已及陷乎
罪然後從而刑之以爲示弗率教化者是罔民也漢

事文墨晉尚清談統紀不明同歸於亂大司徒教典之意六官以為民極之說誰與講明而告君者

奉天

論天官冢宰加官

或問冢宰一官其屬六十顧未始有一事之關乎天者而冢宰謂之天官何也曰此加官也唐虞稽古建官惟百凡天地之運化四時之作訛成易事之關於天者羲和職之教化禮樂之要兵刑財穀之司虞工納言之職十有五人之職所以分天下之萬事而治之者也至周以來則省九官以為六卿之職又省六子以冠六卿之號以虛名而加實職併而授之所以寵而尊之也漢之官制猶為近古大司馬六卿之職

武事者彼霍光領尚書耳內主公卿事外掌四方章奏於司馬何與邪而大將軍之上必冠以大司馬之名此正祖天官冢宰之故意也或曰古者聖人重天道伏羲有神龍之瑞故以龍紀官黃帝有慶雲之瑞故以雲紀官共工以水神農以火少昊以鳥顓帝之後以民則重黎勾芒祝融后土蓐收玄冥是也帝堯之興以天地四時則羲和及四子是也帝舜之興以五行則益火稷穀禹水是也今成王周公之建官考前世之制而兼其長必若所謂虛名加實職則事之關乎天者其屬之誰乎曰子以為古之大臣其所謂寅亮天地而變理陰陽者若曆官星翁文史卜祝之



所為乎凡論道經邦以轉移人主之心術而釐正天下之萬事者皆寅亮變理也皆對時育物撫五辰而熙庶績者也是故日月之薄蝕百川之沸騰詩人以刺卿士穀洛之鬪太子晉以歸咎於執政焉和同天人之際使之無間然者雖聖人之能事而大臣實輔佐之其誰曰人事之非天理也加天官於冢宰之上其尊大臣也雖至其所以責大臣也益深

省官

論天官冢宰兼官

或問太宰至旅下士其為官凡六十有三而為府者六為胥與史者皆十有二而為徒者百有二十何也曰此皆兼官也專官行事則不足兼官行事則有餘

矣蓋自唐虞以來禹以司空而兼百揆羲和以二人而兼四岳及舜二十二人之咨則四岳實一人兼之古者官不必備惟其人而已有其人則備無其人則兼是以周官之作實倣唐虞之制而官事不攝吾夫子所以深責管仲變先王之法也以三公言之召公為保周公為師而太傅無有焉召公實兼之也周公既沒召公為保而太師太傅無有焉召公實兼之也不惟此也三公之下實有三少當時不見其人召公又兼之乃同召太保奭芮伯彤伯畢公衛侯毛公是六卿之長召公又兼之蓋一人之身而兼總七職矣抑不惟此也當是時三公三少既難其人而六卿之

官亦不必備周公以三公兼冢宰召公以三公兼宗伯蘇公以三公兼司寇畢公毛公以三公兼司馬司空惟成王之季年芮伯彤伯衛侯實專領司徒宗伯司寇之職其餘大抵皆兼官也其大者猶兼而況於百官羣有司乎故嘗以周禮考之二鄉則公一人是三公兼鄉老也一鄉則卿一人是六卿兼鄉大夫也軍將皆命卿是六卿又兼六軍之將也甚者太公以太師而兼司盟之職載在盟府太師職之是也蘇公以三公而兼太史之職太史司寇蘇公是也故夫六官之中以春夏秋冬為通率以多少相乘除大約一官凡五百人則六官凡三千人而其兼行權攝者意

其必相半焉

天官卿大夫命士三百五十餘人地官除鄉遂山虞林衡司門司關不可考尚

四百餘人春夏秋三官凡五百餘人是六官通率之凡三千人也是以局分不必設

府史胥徒不別置雖置而其數亦未嘗過濫也且不見鄉老遂師而下乎府史胥徒四者俱無有何獨於天官冢宰而疑之也若夫專官行事勢宜多而不宜省則獻人之與甸師其徒皆三百人而春官御史其史則百有二十八矣

內治 論天官冢宰屬官

或問三公與王論道經邦當時下兼冢宰而其所統六十官之屬往往皆士大夫所不屑為之務何也曰此固所以論道經邦也人徒見夫內外庭宿衛之士

士之賤者也烹庖饗膳之事事之辱者也魚腊酒漿
醯醢之物物之微者也次舍幄帟裘服為末用而官
寺嬪御酒埽使令為冗役也而不知夫三代以還所
以盡壞人主之心術而侵奪大臣之權柄者往往皆
是人為之蓋公卿大臣其內外則有限其進退則有
時不得日侍人主之左右前後也若夫侍御僕從之
人備趨走使令之職而人主宴私玩狎之際無不與
之同焉比其極也則變換其耳目感移其心志伺候
以和其言夸靡以中其欲小廉小謹以市其信人主
一墮其中則亦何所不至哉故雖以文武之聖而侍
御僕從猶樂於得正人而周公之所以相成王而詔

後世者又不獨見於太宰之屬他日立政之作尤拳
拳於綴衣虎賁趣馬之微焉昔者先王之時宗祝在
廟三公在朝三老在學而前巫後史卜筮瞽侑凡所
以在左右者無不致其謹焉用能保護君心養成聖
德宦官宮妾便嬖側媚得以趨走使令於前而不得
以乘間取榮寵竊威福也周公之深智遠識固有見
於此是以亂萌禍機之所在無不究極用見古人輔
相之事業皆格物窮理之學要非屑屑然樂親羣有
司之細務而後集權勢以尊已也宮中府中俱為一
體後世識此意者諸葛孔明一人而已漢初猶存此
意士大夫所不至者惟後庭爾朝夕出入禁闈洞然



無內外之限故人主親士大夫之時常多而親宦官
 宮妾之時常少日見正事日聞正言心安而耳目熟
 論道經邦之地固造原立本於此也自武帝宴遊無
 度於是外庭日疏內庭日親公卿大夫一切隔絕不
 接見而小人獨在左右事趨媚矣大臣無權而小臣
 專權異時關內侯騎都督之爵下及於烹庖樂工醫
 師之賤至鳴玉而曳組房闈有制政之漸妃妾起巫
 詛之風閹寺擅廢立之權夫誰得而制之微物細事
 其傾禍毒國至於此烈也而今世儒者顧方不屑意
 於天下之細務溺意高遠學僻而事左異日敗理傷
 化則往往起人主厭薄之心是故書生之清談而迂闊
 者不足怪也論道經邦之事業當於太宰屬官而求之

官吏

論六官府史胥徒

或問府史胥徒庶人之在官者也先王之時無曠土
 無遊民彼在官者以何人為之祿足以代其耕也以
 何祿賦之以一歲而更邪或終身而充邪抑免其家
 之徭役與否邪曰學周禮者其論此固多也而未有
 愜人意者焉蓋其說則曰民自民也吏自吏也一日
 為之則終身居之此則不可之大者夫終身為吏異
 時既老且死誰其代之謂其子孫繼之邪則不幸有
 愚不肖之嗣何以遽服公家之役謂其子孫不得繼
 邪則當削其祿而授之田彼素不習農畝之人何以

遽安耒耜之勞苦不然一人為吏則一家世其祿也
 先王之祿地固無若是多也後者之來將何以待之
 余嘗考之矣凡起徒役毋過家一人此兵賦之定數
 也甸出長轂一乘此車賦之定數也司馬法則曰井
 十為通通三十家士一人徒二人通十為成成三百
 家革車一乘士十人徒二十人積而至於終則為士
 徒者四百又積而至於同則為士徒者三千夫以周
 官甸法考之甸六十有四井受田之民五百一十二
 家矣今士徒乃止於三十何邪說者以為此調兵之
 法先王寬民力之意故兵者視農者而損行者視居
 者而益不知王畿之兵未嘗輕出何為而遽發之就

如其議則均之為兵耳使居者處其安而行者處其
 危得無有未平乎司馬之所征是固府史胥徒之所
 出也嘗考是四者之數於六官之中蓋冢宰一官則
 二千六百六十有六宗伯一官則二千三百四十有
 一司馬則三千二百六十有五司寇則二千六百五
 十有七四官之數固已萬人矣又況地官無常數冬
 官散落不傳雖權行兼攝官未必置而府史胥徒未
 必實有而其數固已多矣不調諸民而充之其誰實
 為之哉然則是徒之征其為府史胥徒之用昭昭也
 蓋自六鄉而至六遂自六遂而達三等采邑凡受私
 田而為民者其有德行道藝則大司徒三年大比而

升之升於司徒則不征於鄉其止於有才有力者則大司馬立法而征之更調迭發以給公家之徭役焉其上者為府為史其次為胥又其次則為徒上以充宿衛下以給官府其在官則祿於四郊其任事則止於一年其受代而去則復業於百畝一人去之一人居之今之為吏者乃昔日之為民者也今之為民者又後日之為吏者也閭閻之利病田里之躋阨夫家之眾寡馬牛六畜之登耗政事法令之可否上下相諳彼此相恤更處而迭為之吏無所病於民而民無所苦於吏先王維持天下之政固不惟公卿大夫士而已雖府史胥徒亦有助矣

宰相

論太宰建邦六典

或問六卿分職各率其屬見於周官之篇以官府之六屬舉邦治以官府之六職辨邦治見於小宰之職自治典至事典截然分畫宜若一定而不可易今太宰之職顧曰掌邦之六典何也曰此太宰兼行六卿之事也自其分職而言之凡朝廷之事固屬之太宰國中之遠郊近郊大都小都公邑家邑凡郊畿之事固屬之司徒職方氏土方氏以至禪人凡邦國之事固屬之司馬禮屬宗伯刑屬司寇工屬司空自太宰之兼行六卿而言之則六典八法八則八柄八統九職九賦九式九貢九兩凡此十條皆經國之大綱政

事之條目而散見於三百六十官之中太宰實舉其
 綱而攝其要焉又非獨曰格物窮理克勤小物而已
 也蓋唐虞三代建官之制職事分於下而權網合於
 上非泛然而無統也四岳通內外之官羲和之長也
 羲和則實聽於四岳百揆宰相之職百官之長也九
 官則實聽於百揆百揆統九官四岳四岳統羲和四
 子比附聯絡天下之治雖非一二人為之而實一二
 人能使之成周之制亦然三百六十屬聽命於六卿
 而六卿聽命於冢宰冢宰實三公兼之渙散分析之
 中而有比附聯屬之勢自今職職而考之太史內史
 掌六典八法八則八柄之二春官之屬也而典法之

正則在於太宰太僕掌諸侯之復逆小臣掌三公及
 孤卿之復逆御僕掌羣吏之逆及庶民之復夏官之
 屬也而臣民之總則掌於宰夫司士掌朝儀之位秋
 官之屬也而治朝之位宰夫掌之泉府廩人倉人掌
 財用地官之屬也而貨賄之出入太府掌之內外朝
 之冗食地官橐人之職也而宮正內宰則又均其稍
 食王朝之服飾春官司服之職也而內司服至屨人
 則又掌其服飾之用自宰夫之下夏采之上六十官
 之內三百六十官之職錯綜而互見焉並建六典兼
 行六卿天下萬事凡有關於理亂安危之大者則無
 不合然在其掌握之中也蓋古者三公無官惟與天

子坐而論道故設六卿以分主六典而三公實統之
三公既兼冢宰則六卿之六典非冢宰而誰建邪此
事權之所以合於一而國家所以無多門之政自漢
以來則失之矣有三公又有九卿而丞相御史未嘗
行九卿事觀武帝時桑弘羊等致利王温舒之屬峻
法倪寬等推文學九卿更進用事不關決於丞相而
大臣之權盡去矣嗚呼人君之為天下如欲稽古正
名而使事權之合於一苟舍周官未有不泛然無統
者矣

太平經國之書卷第一


後學 成德 校訂

太平經國之書卷第二

永嘉 鄭伯謙 節卿

官民 論二典官府萬民

或問周有三公有六卿今太宰經理邦國其職則治
官府而紀萬民事權之重如此其所以異於三公者
如何也曰三公論道變理而已不親治也況當是時
三公既兼太宰則治之事權非太宰典而誰專之太
宰建邦六典余嘗論之矣此不復述也太宰之所當
論述者則其所主之百官萬民耳然太宰實專主百
官司徒實專主萬民學周禮者苟得其說焉則二官
節日皆可以迎刃而解也且禮刑政事之典均曰百



官而獨於治典則曰以治官府以紀萬民於教典則曰以教官府以擾萬民變百官而言官府說者以為天地二官不拘其數所以尊之也是則然矣而未究其大旨也周官之書曰冢宰掌邦治統百官均四海司徒掌邦教敷五典擾兆民前有六典後有周官皆周公所作也六典則合官民而並職之周官則分官民而各掌之何也治道之要莫切於張官而置吏也官吏不職則治道為之不振立國之本莫切於愛民也民生不遂則國本為之不立是以太宰專主百官凡其八法之所治八柄之所馭歲終之所廢置三歲之所誅賞凜凜然有不可犯者故雖六卿各率其屬而趨事赴功之際聳動警飭而不敢不勉者無非所以奉冢宰之治也司徒專主萬民凡其十有二職十有二政十有二教三物之教五禮六樂之教斷斷然有不敢忽者故雖六卿各主一鄉而聯事合治之際纖悉瑣碎而不敢不盡心者無非所以奉司徒之教也司徒太宰是以獨曰官府而小宰為之貳宰夫為之考一則曰官府二則曰官府也府之為言百官之所摠而萬化之所關也雖然九職九兩太宰非無與於民也特紀綱其大者而已命鄉論秀司徒非無與乎官吏也特教養之於初而已六典合而言之周官分而治之二書蓋相為表裏也成周之治大抵自上

而達於下自內而推於外端本以澄源詳近而略遠
 故六卿各主一鄉一公則率二卿且太宰司徒當時
 既以二公兼之其外四卿意當時亦必以此二公率
 之一以率畿內之官一以率畿內之民本立於上而
 末自舉於下治教行乎王畿之近而若吏若民自風
 動乎四方萬里之遠所謂正朝廷以正百官正百官
 以正萬民正萬民以正四方四方正遠近莫敢不一
 於正天下之大舉無異乎一堂之上所謂行法自貴
 始王化自近始建首善自京師始其道蓋如此也周
 衰此意不存六卿分職不足以倡九牧而阜兆民邦
 畿千里不足以正萬民而假四海亂發於上而禍及

於下本實先撥而枝葉受其害成王周公體國經野
 設官分職以為民極之政靡有子遺矣夫世未有誅
 賞不行於百官而能使百官戒懼不敢易紀律者未
 有生聚教訓勸相勞來不加於民而能使海內革心
 易慮以聽上之所為者穆王欲興文武成康之治雖
 未見其能復還太宰之職而命君牙以為周大司徒
 又命伯冏以為周太僕正而正於羣僕侍御之臣考
 之周禮太僕傳言於宰夫而宰夫聽命於太宰此不
 可謂不知本矣厲王板蕩無綱紀文章陵遲至於幽
 王厲階之生實起於二官之失職故家伯維宰番維
 司徒詩人疾而刺之而十月之交之詩所以作也然




則後世欲復成周之治當先治官與教民欲無一官之不職無一民之不善當先復太宰與司徒

官刑

論官府都鄙法則

或問周官一書成王所以勸其羣臣者寬厚溫和惟恐其或傷周禮之一書成王所以御其羣臣者嚴厲督責惟恐其或敗我事何也曰勸之之辭徒詳而治之之法不繼則無以聳聽而起其怠人情於此亦未必有退聽而從命者是故內而官府凡治教禮刑政事之屬外而都鄙凡王子弟公卿大夫之衆皆有法則以治之蓋貴有常尊賤有常卑賤者不嫌於無法故未嘗忘教貴者不嫌於無教故行法必自貴者始

夫是以官刑之所糾官計之所弊舉辨會聽經正之別刑賞祿位廢置之馭凜若秋霜隱若雷霆不可犯也曰法曰則其名雖異其用則同而或者以為詳法而略則所以詳內而略外猶禹貢綏服三百里曰揆文教要服二百里曰蔡也噫先王之治天下固有詳略之不同而千里之王畿三等之采地未遽略也八法以治官府既見於太宰而六敘六屬以下復述於小宰是官府之治固詳也宰夫掌治法以考百官府郡都縣鄙之治司會掌六典八法八則之二以逆邦國都鄙官府之治則都鄙之治豈得以為略乎且獨不見祭祀以馭神乎先王設禮樂教化刑罰慶賞不



獨以經理其生民雖幽而鬼神無不及焉是故順成
 之方八蜡乃通有功者無不報也犧牲既成粢盛既
 潔旱乾水溢則變置社稷無功者不可奪也被其幽
 而無形深而不可考曖昧恍惚而難及以政者先王
 不敢不致其詳焉而況於為吾之官吏乎是故都鄙
 之治所謂法則以馭其官者即官府之八法也所謂
 祿位以馭其士者即官府之六敘也其餘廢置刑賞
 莫不皆然觀先王之治都鄙夫亦自其所難及者而
 觀之耳日月寒暑堯秩敘而賓餞之江河淮海禹疏
 導而平治之天地之大也先王猶及以政曾謂官府
 都鄙而遽有詳略之分乎謂詳法而略則詳內而略
 外不能觸類而觀之者也不足與論先王之治

攬權

論八柄八統詔王

或問太宰主羣吏司徒主萬民而吏民之事太宰又
 得以兼行之天下萬務無不在掌握中而八柄馭臣
 八統馭民太宰必以詔王何也曰凡邦之小治則冢
 宰聽之柄謂權柄之大也統謂統御之大也出乎法
 令之外而行乎操縱闔闢之間是非人臣之所得為
 也蓋聖人之道有經有權經者法之常而權者法之
 變使聖人之為天下一切聽於法而無操縱闔闢之
 權以變通之則吾之爵祿生殺有時而窮而人情取
 必之餘亦有時而玩是非可常之道也故自八柄而



言之有德者宜貴也或無爵而未貴有功者宜富也
 或無祿而未富非所可予而有私恩之施以為幸非
 所可赦而有私義之免以為福置之尊貴而使自愛
 奪其榮富而使貧窶罪重於過而或止於廢過輕於
 罪而或抵於誅此皆人主之所用以為聳動天下之
 具而不使人有自必之心者也自八統而言之親故
 賓客固當敦敬而尊禮賢能勲貴固當任使而保護
 然恃恩者常易驕恃才者常易傲而服勤盡瘁之士
 亦不能無累日取貴之心今也親親未已而賢賢繼
 之尊尊貴貴未已而下下繼之內朝序齒忽變而序
 爵於外朝投壺燕躬序賢或變而序官於宗廟不拘

於一而迭出於八此又人主之所用以為轉移變化
 之術而不使有自恃之心也施不測之恩用不測之
 威我可以取必於人而人不可以取必於我使一世
 之人皆有以奔走而畏慕而不得以邀持而固必暫
 出於我而天下之人被之者鼓舞而喜慘怛而悲此
 豈非權柄統御之大者乎太宰雖尊人臣也如使人
 臣而亦得以擅權柄專統御擺落乎法令而雜用乎
 經權則繩墨廢而法守亂末流之弊將至於蕩然自
 肆誣上行私之人皆得藉口以專其欲矣周公所甚
 慮也其大者歸於王而其小者則守於冢宰其權而
 變者歸於王而其經而常者則守於冢宰若內府供

王之好賜予及冢宰之好賜予此好賜予之常者也
若司會以周知四國之治以詔王及冢宰廢置此廢
置之常者也若小宰之六敘以正其位以置其食此
祿位稍食之常者也若表記言周人之親而不尊祭
義言周人貴親而尚齒此親親之常者也太宰守其
常故其待百官萬民有一定之法人主用其權故其
疾速進退皆在我而百官萬民不得執法以要其君
雖然權固人主之所得用也而必待太宰之詔此亦
慮其所終而稽其所弊矣君相之間相濟而相維持
者如此成王周公之世王朝之上所以無一官之不
盡其職而王畿之內所以無一民之不入於善也蓋

天下之人見太宰必然之法則不敢以不自盡見人
主或然或不然之權則內不敢以自恃外不敢以自
必激昂振厲惟知自強於為善而已昔者嘗觀諸夏
商與齊魯之事則大異於周矣蓋夏后氏先賞而後
罰親而不尊其民之敝至於恚而愚喬而野朴而不
文商人先罰而後賞尊而不親其民之敝至於蕩而
不靜勝而無恥及太公治齊舉賢而尚功周公曰後
世必有篡奪之臣周公治魯親親而尊尊太公曰後
世浸衰矣蓋齊之所為無以異於商而魯人之治則
夏后氏之治者矣用必然之賞用必然之罰必親親
必尊尊必舉賢而尚功取其一定者而固守之其末

流固至於此此宜周公之所懲也為之定法以自守於其下使人主時用其意而操縱闔闢於其上上下相與出於必然不然之中然後可以振厲人心於無窮

太平經國之書卷第二

後學 成德 校訂

太平經國之書卷第三

永嘉 鄭伯謙 節卿

養民 論太宰九職任民

或問先王井天下之田分天下之民凡民皆受田凡受田皆為農而太宰之九職三農九穀之外又有園圃虞衡藪牧工商嬪婦之民未免有農末之分何也曰此即受田之民為之非其餘力則有餘夫也至於臣妾則男或一夫女或一婦既不可以受田於公家其勢必服役於私室先王於此則使之聚斂疏財以取其利若九兩之主以利藪以富是也

芻芟以飼國馬今時人取草以飼牛取萍以供祭祀
犬豕負冰拾髮竹頭木屑皆疏材之屬者也

則私田九一之餘公田十一之外既不從事於園圃
 虞衡藪牧之地又不從事於工商嬪婦之業先王於
 此則使之轉移執事以共其利若司徒之生材里宰
 之鋤粟是也蓋嘗因事論之以為先王與民為生後
 世則民自為生至於今世民無以為生矣夫與民為
 生吾不敢以望後世矣而聽民之自為生獨不可乎
 不聽其自為生而至於無以為生民病則極矣而暴
 君汙吏又從而朘削之征科色目百出而未已日夜
 疾視其民而斂之若讎不至於貧感潰散則不止則
 夫無以為生之民於是有輕用其生者矣非復有依
 依不忍去之意於垂亡臨絕之餘如先王之季世也

嘗觀周之先王其所以與民為生非一事也井九百
 畝其中為公田八家皆私百畝使之相養相生如是
 足矣為之比閭族黨州鄉為之鄰里鄴鄙縣遂為之
 溝洫澮川畛塗道路以安其生為之禱祠醫藥之政
 為之調救補助之法以衛其生如是又足矣而猶以
 為未也謂王畿之內皆齊民而未有特富者生生之
 具雖以粗給而祭祀喪紀猶有所不足而取於常數
 之外於是九職之任頒焉雖臣妾間民皆不敢遺而
 亦必有以厚其生當是時也豈復有農者一而食者
 六工者一而用者六賈者一而資者六乎思慮周密
 安養生利備至蓋不措之於仰事俯育無憾之地則



鬱鬱然如有負於斯民也反復太宰之九職未嘗不
 三歎先王之政以為先王孜孜為民之心即後世孜
 孜為已之心轉移而為此此民所以樂其上之愛已
 而忘其勤於是相與出其賦稅以供其上稅以足食
 賦以足軍國之用而先王猶不敢泰然而享之斗粟
 尺帛則有司存鈞考會計猶恐其用之妄間有水旱
 不登則焦然凜然念民生之不易禍至之無日捐租
 出粟欲減膳而不御樂矣夫其與之也甚厚取之也
 甚薄而用之也甚嗇民知上之與已者至故其所以
 奉上者亦至非若後世之徒取而徒與也自井田壞
 而貧富不均上之人猶不能制民之常產況敢望其
 九職之任乎而民始自為生矣有父子兄弟夫婦之
 聚而無衣食生養之資窮居感處不自聊賴去而為
 工技散而為商賈不得已而為庸保而民之為生始
 勞矣迫之以水旱役之以軍旅困苦之以疾病死喪
 而民始無以為生矣不反其本方更圖易令以求豐
 財上之公卿大夫下之百司庶府中外之學士大夫
 日夜講求理財之策民何以足而國何以堪邪先王
 之事吾誠不敢以望後世矣無以則聽民之自為生
 乎

稅賦

論太宰九賦九貢

或問畿外有貢畿內有賦有稅有斂之目其別如

何曰公田以為稅私田以出賦征斂則稅賦之總名
 家征力征則以一家餘夫之力言之夫征地征則以
 一夫私田之賦言之若畿外諸侯則食公田之稅以
 為祿幹私田之賦以為貢耳學者於貢賦稅之說何
 其紛紛也愚請略公田之稅而姑論畿內之賦次及
 於畿外之貢然後紛紛之說可以盡折而一之人徒
 見夫稅以足食賦以足兵則以民賦為止於兵車以
 九賦為諸臣祿田之賦非也稅賦雖一而賦有三凡
 起徒役毋過家一人此兵賦也甸出長轂一乘此車
 賦也一曰邦中二曰四效而下此九等之賦也時方
 有事則農出一兵甸出一車事已則兵還於農車還

於甸雖名為賦其實則使民自為衛耳有以足軍之
 用而未有以足國之用也國之大用有祭祀有賓客
 有喪荒羞服有工事幣帛有芻秣匪頒好用不取諸
 民於誰責而供之於是始助百畝之私以制九等之
 賦勸九職之任以代九賦之出今考之周禮國中四
 效之賦閭師征之野之貢賦縣師征之委人征薪芻
 木財獸人廛人收皮毛筋角角人斂齒角羽鬮中人
 收金玉錫石澤虞取國澤財物掌葛掌染草則征絺
 綌染草以當邦賦掌炭掌茶則征灰炭茅蒭以當邦
 賦其始也以九穀為主而其終則皆以九職之物充
 賦其始也以五等定輕重而其終則皆以年之上下

出斂法熟讀一書其所以孜孜於田賦之說者蓋以其未始立法也若公田十一之稅周禮曷嘗一言之豈惟公田太宰九等之賦不言軍旅亦以一兵一車之出自有定制耳此自黃帝爲井牧以來未之有改彼則自周公之身而經始之色日常慮其巧立輕重常恐其過差有無常患其相違受用常憂其相亂是以太宰正其名載師酌其數閭師縣師隨其物太府謹其待用蓋其終始本末無毫髮不經思慮者達之王畿之外則有異名而無異法諸侯食其稅於國則稅之名變而爲祿諸侯納其賦則賦之名變而爲貢始於太宰之致其用中於司馬之制其賦終於小行

人之令其獻考之職方氏自楊之金錫荆之丹銀以至并之布帛此即取物以充賦也又考之大行人自侯服之祀物甸服之嬪物以至要服之貨物此即變賦以爲貢也其纖悉委曲則與畿內無一不相應者蓋嘗以禹貢之書考之然後周禮貢稅賦之別源流會通益無可疑者夫冀州在王畿之內堯之所都也厥賦惟上上厥田惟中中是公田之稅雖其等在五而私田之賦折以他物則其等實在一也此乃太宰之九賦也八州在王畿之外諸侯之國也田賦之下於是始立爲貢筐之制焉有金木鈛石之貢有漆絲羽茅之貢有球琳琅玕銀鏤砮磬之貢此則太宰之

九貢也然禹貢與周禮少異者周禮畿內之類通可
 以言貢而禹貢則專指以為賦禹貢畿內之賦專以
 米粟之屬而周禮則雜以他物代之此特其微異者
 耳不害其為同也周衰王制不明貢稅賦之法不復
 存成王周公之制魯之宣公初稅畝是以公田之外
 復履私田之畝行十一之稅雖然賦則尚無恙也至
 於成公之作丘甲則每三甸而加一乘兵車之賦非
 復司馬法之舊哀公之用田賦則受田百畝而出賦
 二十畝私田之賦非復載師之舊至於邦國之貢益
 悖謬而無統包茅不入王祭不共是諸侯既不致貢
 於天子子產言鄭伯之男而使從公侯之貢見昭公十三年

是晉人責貢於諸侯者又難給焉此豈惟非周家之
 舊法哉虞夏貢賦之法自三代以來所謂相承而不
 廢者至春秋而埽地矣嗚呼讀周禮見周之所以盛
 讀春秋見周之所以衰

節財 論九式均節財用

或問王制之書言冢宰歲杪制國用此九賦九貢之
 後亦有九式以節財用冢宰與王論道經邦者而區
 區於理財用之末何也曰君心之非莫大乎侈心之
 生財聚於公上而大臣不敢搏節於其間則府庫之
 充物財物之浩穰而人主之宮室器用服食賜予一
 切始無度矣是固蠱壞心術之大源而以道佐人主



者之急務也余嘗論冢宰屬官以爲內外庭宿衛之士士之賤者也烹庖饗膳之事事之辱者也魚腊酒漿醢醢之物物之微者也次舍幄帟喪服爲未用官寺嬪御洒埽使令爲冗役而宴私玩狎之際易以惑悅人主之耳目而侵竊大臣之權柄是以冢宰一舉而盡握之此固一說也然而府庫之財物國家之耗費亦莫大乎是數者之間使太宰身不得總其人心不得約其用則多寡豐殺去取用舍損益之目誰得而檢之秦漢以來散無統紀武帝窮奢極侈尤爲無度衛士已三萬人而郎衛之外又增置期門羽林南北軍之外又增置八校尉無復多寡之節少府掌山

海池澤之稅以充天子私供養大官七丞主膳食湯官主餅餌導官主擇米庖人主宰割無復豐約去取之制黃門紛事禁中鈎盾掌苑囿尚方作禁器御府主衣服掖庭永巷亦置八丞上林池籟多至十監無復用舍損益之限北至朔方東封泰山所過賞賜用帛百餘萬疋金錢以鉅萬計縣官空虛而吏始坐市列肆販物求利矣異時元帝在位雖號溫恭少欲而齊三服官作工各數千人一歲費數鉅萬蜀廣漢主金銀器歲各用五百萬三工官官費五千萬東西織室亦然廩馬食粟將萬疋此御史大夫貢禹所以拳拳獻忠願減諸離宮及長樂宮衛之大半太僕減食

穀之馬水衡減食肉之獸省宜春之苑罷角觝之戲
 復齊三服官之舊而還高祖孝文之節儉也雖然禹
 徒知有高祖孝文之節儉而豈知有太宰九式之均
 節邪以周禮考之膳夫歲終則會惟王及后世子之
 膳不會庖人歲終則會惟王及后世子之膳禽不會
 酒人歲終則會惟王及后之飲酒不會 內府歲終
 不會王后之服司裘歲終不會王之裘 夫一歲之
 財有限而司徒所以制一歲之入冢宰所以制一歲
 之出者亦有常令而會曰不會豈真使王后世子得
 以自便而自取邪彼賤有司也以區區賤有司而與
 至尊較出入之是非計用度之當否則於勢為不順

於事為難行是以上取之而下供之而多寡豐殺去
 取用舍損益之數則自有九式存焉吾何與知而與
 至尊者較曲直取與邪是故好用匪頒吾則共之芻
 秣幣帛吾則共之工事羞服喪荒賓客祭祀吾則共
 之以至向之所謂賤士辱事微物末用冗役吾又一
 切共之而一曰祭祀之式至九曰好用之式太宰則
 總持之夫惟財共於有司而式法持於太宰是以人
 主不敢違式法而過取百官有司於此亦不敢至於
 違式法而過共宰夫以式法掌祭祀酒人以式法授
 酒材掌皮以式法頒皮革委人以式法具薪蒸木材
 職幣以式法斂幣餘職歲以式法贊逆會太府以式

法頒貨賄人主之私心以式法而礙則侈心以式法而銷國用不屈民力不匱而玉府之財用始沛然有餘而論道經邦之地始造原立本於此而無以盡壞之也或曰小宰之職以法掌祭祀朝覲會同賓客之戒其軍旅田役喪荒亦如之七事者今百官府共其財用今九式之中乃不及朝覲會同軍旅田役何也曰朝覲會同之用不過宰禮委積膳獻飲食賓賜殮宰而已此則賓客之式也軍旅田役之用亦不過幣賚委人共委積薪帛司勲掌賞地宮正頒衣裳車人矢人繕人橐人司弓矢司甲兵之數一切皆有法式以給其財此則幣帛芻秣匪頒工事之式也或又曰

軍旅田役莫大於餼糧而不爲之式何也曰居者積倉行者裹糧人自爲具非公家之所給也公家之所給惟官府中供軍士者耳此則有廩人治師役之糧食倉人共道路之穀食遺人掌道路之委積是不爲無法也大抵太宰之所謂理財惟急於理其出而已蓋財多則下之用者易失之滲漏上之取者每患於過差九式之法不過以搏節人主亦以隄防百官有司之失物辟名也式法不行而後上下始交征利矣錙銖而取泥沙而用竭九州之財不足以贍一人之欲而公私始俱受其病矣嗚呼是其所以爲秦漢矣太平經國之書卷第三

後學 成德 校訂

太平經國之書卷三
論九兩繫邦國得民
或問九兩之中曰牧者君也曰長曰主曰吏者官也
彼其分君之職居民之上凡可以助君而得民者固
其分也有如師儒之間宗族朋友之際山林藪澤之
豪豈常有位於朝有祿於國者邪而均之曰得民與
牧長主吏並立而相參何也曰此先王防患之深意
也夫千里王畿之外公侯而下伯子男而上其君皆
牧伯也千里王畿之內近而鄉遂遠而都鄙其官皆
長吏也三等采地之間卿之有邦縣公之有邦都其

太平經國之書卷第四

永嘉 鄭伯謙 節卿

保治 論九兩繫邦國得民

或問九兩之中曰牧者君也曰長曰主曰吏者官也
彼其分君之職居民之上凡可以助君而得民者固
其分也有如師儒之間宗族朋友之際山林藪澤之
豪豈常有位於朝有祿於國者邪而均之曰得民與
牧長主吏並立而相參何也曰此先王防患之深意
也夫千里王畿之外公侯而下伯子男而上其君皆
牧伯也千里王畿之內近而鄉遂遠而都鄙其官皆
長吏也三等采地之間卿之有邦縣公之有邦都其

人皆主也牧伯皆有分地則其地大有以服民公卿各有采地則其利入有以得民長與吏雖有祿而無地然既食其祿則民亦有以尊其貴既專其政則民亦有以悅其治蚩蚩之民其聚必以類其分必以羣為之兩則渙散四出而其勢不可合矣是以牧長主吏先王各使之繫其民而聽其兩不可縱也不聽其兩則其勢將至於渙散聽其兩而從其得民他日有懷詐怵邪之諸侯傾側擾攘之士出於其間則逆節之萌禍心之包藏其將何以制之先王於是有師儒朋友宗族豪富之兩以參互於其間是九者相與為兩而後邦國之民有所耦合有所耦合而後有相訓

相保相及相共相利相安之道昔者孔子孟子以布衣匹夫而衣冠禮樂足以師表一世其門人弟子不遠數千里而從之雖饑寒流落濱於死而不去此師以道得民也庚桑子居乎畏壘而畏壘之人相與尸而祝之社而稷之陽城居於晉之鄙人薰其德而善良者幾千人此儒以道得民也商之七族宋戴武莊之族齊諸田楚懷屈率以強宗大族更相維持繫屬人心若漢郭解之游俠輕財重義出萬死一生以救人之急而任之事則民心爭慕而惟恐或後蜀卓氏孔氏程鄭刁間之徒占山林藪澤之利殖貨累鉅萬而富比封君隱民皆取食焉此三者以族以任以富

而得民也九者各有以得民之心各有以聯民之族
 類相悅而相附相制而相維持故彼動而此禁一萌
 則一握先生經理邦國之大意隱然可見於此後世
 王制不明是九者雖未嘗不兼有而為治者不知也
 徒為之牧長為之主吏而所謂師儒朋友富家大族
 未嘗過而問焉是以越雪蜀日吠噬狂走上之人不
 以為意而師之得民者廢溺冠騎項之餘俳優侏儒
 爭以儒為戲而儒之得民者廢禁游俠破黨伍而朋
 友之得民者廢誅鋤強宗遷徙大族嫉惡州縣之富
 室而宗族豪右之得民者又廢五者盡廢而牧長主
 吏雖存又皆割人以自奉役人以自安耳州縣之守

今大抵以辦財賦為職而得民之道百郡千邑無復
 一人經意矣秦漢以來牧長主吏之間如有番令吳
 芮南海尉佗才得江湖嶺海之人心遂起而王其地
 魏其武安以招致賓客之勢而傾動天下吳王濞擅
 山海之利賦不及民拊循招納而山東七國之變相
 挺矣士不考論後世之變而能見太宰九兩繫民之
 說則孰知先王防患之意深

考課 論三官申明考察

太宰正月之吉始和布治於邦國都鄙乃縣治
 象之法於象魏使萬民觀治象挾日而斂之司
 徒司馬司空皆然乃施典於邦國而建其牧立



其監說其參傳其五陳其殷置其輔乃施則于
 都鄙而建其長立其兩設其伍陳其殷置其輔
 乃施法於官府而建其正立其貳設其考陳其
 殷置其輔凡治以典待邦國之治以則待都鄙
 之治以法待官府之治以官成待萬民之治以
 禮待賓客之治歲終則令百官府各正其治受
 其會聽其致事而詔王廢置三歲則大計羣吏
 之治而誅賞之小宰月終則以官府之敘受羣
 吏之要贊冢宰受歲會歲終則令羣吏致事正
 歲帥治官之屬而觀治象之法狗以木鐸曰不
 用法者國有常刑乃退以宮刑憲禁於王宮令

於百官府曰各修乃職考乃法待乃事以聽王
 命其有不共則國有大刑宰夫歲終則令羣吏
 正歲會月終則令正月要旬終則令正月成而
 以考其治治不以時舉者以告而誅之正歲則
 以法警戒羣吏令修宮中之職事書其能者與
 良者而以告於上

或問太宰之職自六典佐王而下九兩繫民而上凡
 此十者經國之大綱為治之條目既兼舉而並行之
 矣今正月之吉乃始和而布之正歲之月乃始垂而
 觀之邦國都鄙官府之中乃始施其治牧監正貳之
 屬乃始建其人何也曰此所以申明吾之法也歲終

三歲將有以考課其人正月正歲不得不有以申明其法蓋慢令而致期不戒而視成先王猶不敢以施諸民而況於其官吏乎未嘗警戒之而遽置廢誅賞之平時既無以起其怠而策其進一旦亦無以示其信而愜其心先王不為是也舜相堯二十有八載矣而正月元日四岳四門之詢闢四目四聰之明達十二牧之咨二十二人之戒猶諄諄然命之者是固將以為考績之地也夫是以前黜陟而去四凶天下至於咸服後黜陟而分三苗庶績至於咸熙三代以來世守此道每歲孟春適人以木鐸徇于路官師相規工執藝事以諫其或不共邦有常刑在夏為適人在

周即為小宰木鐸未徇則常刑終未施也廢時亂日之人承命徂征之舉至此何所逃其罪耶成湯制官刑以儆有位廣五子之訓以為三風十愆之戒使瞽矇之士具其訓而颺之異時記禮之書考論夏商之制則其本末猶有可言者孟冬之月命太史是察阿黨無有掩蔽命司徒循行積聚無有不斂命工師效功功有不當必行其罪命水虞漁師收水泉池澤之賦其有敢侵刻行罪無赦此所以考課之也季冬之月則曰天子與公卿大夫共飭國典論時令以待來歲之宜孟春之月則曰乃命太史守典奉法司天日月星辰之行宿離不貸毋失經紀以初為常此所以申

明之也由是言之夏商以來所以考課其人則在於孟冬所以申明其法而重爲他日考課之地者則以季冬以孟春是唐虞平在朔易之意而周人之所以依倣而行之者也蓋周人考課之法尤嚴於唐虞三代之舊考之周禮有所謂逆其治者執吾之法而逆倣戒之於其先也小宰司會司書女史職歲職內鄉師太宰內史是也有所謂待其治者既倣戒之則待其成而考驗於其後也太宰以典待邦國之治以則待都鄙之治以法待官府之治以官成待萬民之治以禮待賓客之治如宮正醫師司會大司徒小司徒鄉大夫遂大夫族師黨正鄙師內史司寇士師之屬

則皆所以考其事如宮正膳夫酒正大府職內司會司書內宰典臬泉府橐人金人之屬則皆所以考其財如太宰小宰宰夫則兼統而並考之故日之有成日考之也宰夫受之月之有要月考之也宰夫令之而小宰受之歲之有會歲考之也小宰贊之而太宰受之三歲之有計三歲考之也冢宰贊之而王親受之曰計曰會曰要曰成散見於三百六十官之中自宰夫而下酒正則日入其成月入其要司會以參互考日成以月要考月成以歲會考歲成司書則入要二司徒則正要會鄉師則受役要與夫司馬士師亦皆受而正之蓋有官則必有事有事則必有

考人與官不相違功與法不相悖則置之賞之其官則然其人則不然其法則然其功則不然則廢之誅之太宰既已三歲計吏而誅賞司士亦三歲稽士而進退非一切委之以法而聽其人之自縱也以王制參觀之司會質成三官則從司會冢宰贊天子受質三卿則以百官之成質於天子案王制曰天子齋戒受諫司會以歲之成質於天子冢宰齋戒受質大樂正大司寇市三官以其成從質於天子大司徒大司馬大司空齋戒受質百官各以其成質於三官大司徒大司馬大司空以百官之成質於天子百官齋戒而受質焉六卿皆與考績而冢宰獨操其柄然王制

特舉其略而周禮則備見其詳條目為甚悉其八枋之所施凜凜乎甚嚴也周人考課之嚴如此豈遽行其法而逆責其效也哉其本末源流固自有次第非汲汲焉於朝夕之頃者蓋曰成曰要雖不廢於日月而會計之大則必遲遲於一歲三歲之終申明儆戒之嚴必勤勤於正月正歲之始蓋自六典八法八則其正在太宰太史司書其貳在小宰司會九貢九賦九式其正在太宰司會其貳在小宰太府賜予則掌於宗伯修法則掌於匡人司寇執典法以斷匡人達法則以觀其慝太宰張其紀綱於上而六卿羣吏相與理其條目於下法之所在固已彰彰於人之耳目

不可違也先王於此必謂夫人之情常以久而懈怠
法之意常以久而玩弛是以每歲輒申明之在太宰
則正月始和挾日而後斂在小宰則正歲帥治官之
屬觀治象之法而懼之以大刑在宰夫則正歲以法
警戒羣吏令修宮中之職事而勸之以良能以至大
司徒正歲帥屬觀教而卿大夫州長黨正亦考而讀
焉大司寇正歲帥屬觀刑而士師亦憲而禁令焉凡
昔者經國之大綱為治之條目熒熒然常有日新之
意奉行之吏聯事合治之人欣欣然常有日新之功
由太宰終篇觀之乃施典則於邦國都鄙是所立之
法常若始立而施之也建其牧而立其監建其長而

立其貳是所用之人常若始建而立之也法若始立
之法人若始用之人戒飭勉厲之餘有奮發而無懈
怠有勅正而無玩弛能否畢見賢不肖無所隱至是
而考績之法始可以行小而予奪大而生殺始可以
各當其情也故太宰於正月正歲之既後斷斷然行
其誅賞於歲終而小宰宰夫於歲終已誅賞之餘又
昭昭然揚其禁令警戒於歲始始終之相因勸戒之
相仍王朝之上所以無一人之不善其職歟且不獨
待其人為然也制而用之謂之法推而行之存乎人
人不能皆善既已因法而廢置法不能無弊則亦為
之隨時而損益者也可否之相濟猶五味之相和於

是時也先王猶恐法令出入之際有以亂人聽而未
 孚乎人之心於是正月和而先布之於正歲終而申
 飭之況乎考課之法將以明人之功而正人之罪豈
 得不遲之於一歲三歲之終乎督之迫者課反易考
 而待之寬者責每難酬也雖然夫子嘗曰苟有用我
 者朞月而已可也三年有成又曰如有王者必世而
 後仁是紀綱可以定於朞月之頃而治功可以成於
 三年之後考績之法固可以行於此時也若夫舉一
 世人心皆安行乎大道之中而無所事乎上之誅賞
 是非必世焉不可也此又周禮言外之意成王周公
 之所自知也學者當因吾夫子之言而求之周禮

太平經國之書卷第四

後學 成德 校訂

太平經國之書卷第五

永嘉 鄭 伯謙 節卿

賓祭 論六官祭禮賓客

太宰祀五帝則掌百官之誓戒與其具脩前期
 十日帥執事而卜日遂戒及執事眡滌濯及納
 烹贊王牲事及祀之日贊王幣爵之事祀大神
 示亦如之享先王亦如之贊玉凡玉爵大朝覲
 會同贊玉幣玉獻玉凡玉爵作大事則戒於百
 官贊王命王眡治朝則贊聽治眡四方之聽朝
 亦如之凡邦之小治則冢宰聽之待四方之賓
 客之小治小宰以法掌祭祀朝覲會同賓客之

戒具軍旅田役喪荒亦如之七事者令百官府
 共其財用治其施舍聽其治訟凡祭祀贊玉幣
 爵之事裸將之事凡賓客贊裸凡受爵之事凡
 受幣之事宰夫以式法掌祭祀之戒具與其薦
 羞從太宰而眡滌濯凡禮事贊小宰比官府之
 具凡朝覲會同賓客以牢禮之法掌其牢禮委
 積膳獻飲食賓賜之殮牽與其陳數

或問以典待邦國之治則六典已有賓禮以法待官
 府之治則八法已有官成今邦國都鄙官府之下所
 謂以官成待萬民之治以禮待賓客之治必特舉而
 復見之何也曰先王之所以奉若天道建邦設都立

后王君公承以大夫師長者非以為已凡所以為民
 也曰先王為民之意則重矣彼賓客何為邪曰先王
 出門如見大賓使民如承大祭待天下之民常若待
 客賓之重使天下之民常若臨祭祀之嚴故周禮一
 書有一言以及於祭祀必有一言以及於賓客者先
 王固將以其祭祀賓客之心而為出門使民之心也
 此心無異敬此敬無異用舉是三者而皆以一敬心
 行於其間自常情處之待賓客之心必重於待民之
 心待鬼神之心又必重於待賓客之心夫是以臨祭
 祀則猶能莊敬以自強而待賓客則此敬已少衰而
 待其民則益衰矣敬心日益衰則欺心日益甚蓋至

於此則臨祭祀享鬼神其終亦不誠而已世固未有一心而二用者是以先王待民之心即其處祭祀賓客之心而太宰而下所以勤勤於祭祀賓客而纖悉委曲不敢不盡其誠者固將以廣其敬推其心而達之於天下也且以祭祀賓客言之周之先王知幽明之無異理也故凡宗廟之事則一以人道處之忽焉如在其上如在其左右事死如事生事亡如事存朝事之豆籩以象朝時事其親之所進饋食之豆籩以象食時事其親之所進無非以人器為用焉謂不如是則必至於慢凡賓客之禮則一以神道行之相朝於寢廟相見於阼階凡設而不倚酒盈而不飲

見昭公五年

肉乾而不食樂之有相宗廟則然而賓客亦如之徹之有歌大祭祀則然而大享亦如之大羹鉶羹致美味而彼此無異用監鹽形鹽致多品而幽明無異儀享之用裸而賓客亦有裸胙之用俎而賓客亦有俎無非以神道為用焉謂不如是則必至於褻不慢不褻不敢以易心處之凡衣服器用之類牲膳醬羞之品備羨致美之享贊裸酌獻之儀典之大宗伯而散之三百六十官者無一事之不同焉故先王之與賓客並言於典瑞大享之與祭祀並言於大司樂以至春祀夏禴秋嘗冬烝即其朝覲宗遇之儀也上公再裸諸侯一裸即其灌地求神之味也洞洞之敬屬屬

通志堂

之忠即其濟濟之文肅肅之嚴也人徒見鬼神之道
 茫昧而不可知恍惚而不可見而賓客之事粲然有
 文歡然有恩則以為幽明有異塗而不知其未始有
 異理也自今以太宰小宰宰夫終篇而言之太宰之
 職於祭祀既掌其警戒具脩及其滌濯牲幣於賓客
 則必掌其朝覲會同及其幣獻凡爵小宰之職於祭
 祀則贊於幣爵之事裸將之事於賓客則亦贊裸受
 爵之事受幣之事宰夫之職以式法掌祭祀之戒具
 與其薦羞以牢禮之法掌賓賜之殮牽與其陳數夫
 豈無他事邪而一則曰祭祀賓客二則曰祭祀賓客
 不惟並言之而於天下紛然萬務之中又常首言之

吾固知先王將以其祭祀之心而為待賓客之心又
 將以其祭祀賓客之心而為出門使民之心也凡太
 宰正歲之所申明歲終之所考課小宰宰夫於歲終
 之已考課而復贊太宰以正歲之申明大抵尤嚴於
 此二事而已昔者商之季世紂之不道甚矣而泰誓
 牧誓之所以數其罪者尤在於弗事上帝神祇遺厥
 先宗廟弗祀牲犧粢盛既於凶盜而謂祭無益謂敬
 不足行也夫莫尊於天莫重於宗廟而猶不知敬焉
 亦何有於賓客萬民邪友邦冢君八百所以皆去而
 從周而君子小人所以簞食壺漿而並迎王師也武王
 克商深鑒覆轍訪箕子以洪範而於五行五事之後

天人定位之餘首致意於八政之疇蓋其一曰食其二曰貨其三曰祀食貨既足則首及於報本之祭祀也四曰司空五曰司徒六曰司寇七曰賓八曰師蓋司空以居民司徒以教民司寇以威民而終之賓者以見其平日待民之心無異於待賓客之心也同此一心同此一敬紂以不敬而亂武王以敬而治成王周公親繼志而述事豈敢不究心於此哉抑嘗以周之三頌求之清廟以下諸篇若維清執競皆所以頌成王之祭祀也臣工以下諸篇若振鷺若載見有客皆所以頌成王助祭之賓客 閔予小子以下諸篇若載芟之祈社稷酌之酌祖 所以頌成王之愛

民也成王推其對越上天之心而為待賓客萬民之心故詩人循其序而頌之而其見於二雅者尤詳焉由是言之周之家法始於武王而備於成王洪範之八政以見其略而周官之六典以見其詳周官之六典以見成王之所言而周詩之三頌又以見成王之所行

相體 論小宰宰夫行法

太宰以八法治官府一曰官屬以舉邦治二曰官職以辨邦治三曰官聯以會官治四曰官常以聽官治五曰官成以經邦治六曰官法以正邦治七曰官刑以糾邦治八曰官計以弊邦治

小宰掌建邦之官刑以治王宮之政令凡宮之
糾禁 康成曰今若御史中丞官刑在王宮者之刑建明而布告之也 正歲以宮
 刑憲禁於王宮帥治官之屬狗以木鐸曰不用
 法者國有常刑令於百官府曰其有不共則國
 有大刑以官府之六敘正羣吏一正其位二進
 其治三作其刑四制其食五受其位六聽其情
 以官府之六屬舉邦治其屬各六十大事則從
 其長小事則專達以官府之六職辨邦治以官
 府之六聯合邦治以官府之八成糾邦治以聽
 官府之六計弊羣吏之治一廉善二廉能三廉
 敬四廉正五廉法六廉辨

宰夫掌治朝之法以正王及三公六卿大夫羣
 吏之位掌其禁令敘羣吏之治以待賓客之令
 諸臣之復萬民之逆掌百官府之徵令辨其八
 職掌治法以考百官府郡都縣鄙之治乘其財
 用之出入凡失財用辟名者以官刑詔冢宰而
 誅之其足用長財善物者賞之歲終治不以時
 舉者以告而朱之正歲以法警戒羣吏令修宮
 中之職事書其能者與其良者以告於上
 宮正掌王宮之戒令糾禁 宮中徒役及諸
 內宰掌治王內政令 有王宮有王內言王宰以
王宮師亦掌宮禁 王宮之在外也秋

王宮師亦掌宮禁



或問三百六十官聽命於六卿六卿聽命於太宰其事權亦重矣而廢置誅賞之說僅不過終篇一言之若小宰宰夫所以貳太宰者耳而馭吏之嚴反諄諄言之不置凜凜乎有不可犯者何也曰此所以尊太宰而嚴之也夫坐而論道謂之三公作而行之謂之士大夫周以三公兼太宰三公與王論道經邦究心於理亂安危之大者故惟造原立本出為教修以與當世士大夫躬行而世守之太宰不自親其治也故治官之屬太宰建其典於上而小宰率其職於下太宰操其柄於上而小宰舉其法於下宰夫亦然自內之王宮而言之小宰既建邦之宮刑治宮之政令舉

宮之糾禁憲禁宰夫又以法致羣吏之警戒令宮中之職事書宮中之良能其於治內之法無不致其嚴也自外之官府而言之小宰既推廣太宰之八法以為六敘六屬六職六聯八成六計宰夫又推廣小宰之六職以為八職小宰既曰不用法者國有常刑其有不共者國有大刑宰夫又曰失財用物辟名者以官刑詔冢宰而誅之治不以時舉者以告而誅之其間掌其政令掌其禁令掌百官府之徵令弊羣吏之治敘羣吏之治考百官府郡都縣鄙之治其於治外之法尤嚴於治內也治內外者嚴則所以尊太宰者為甚嚴尊太宰者嚴則所以尊人主者為益嚴君宰

尊嚴則朝廷清明小大稱職百官於是乎戒懼而有不敢易紀律者當是時也太宰常居其逸而小宰宰夫常見其勞太宰常見其寬而小宰宰夫常見其嚴厲而可畏秦漢以來此制隳矣大臣之道揆不明而百官有司之法守滋亂陳平雖自以為上佐天子理陰陽下遂萬物之宜而不對文帝錢穀刑獄之問然亦未為得太宰之體者蓋小宰宰夫之所頒行無非本於太宰之所建立焉且食貨國家之大本廷尉生民之司命宰相愬然不以為意一舉而盡付於其人而曾不究竟其大綱經理其本末源流乎是以清談而不事事為好言以自解耳刀筆筐篋而不知大體


者則又不過如賈生所言時以簿書不報會期為大故與夫王吉所謂公卿幸得遭遇其時曾未有建萬世之長策舉明主於三代之隆者其要在於斷獄聽訟而已也以諸葛武侯之賢相蜀之日夙興夜寐罰二十以上皆自親之而出師臨發之表僅方以宮中之事委之郭攸之費禕以營中之事委之向寵其見亦已晚矣大抵自周而降宰相大臣其清談不事事者則宏綱大法之所當經理一切委棄而弗顧其不能拔於俗吏而困於文墨者則雖斷獄聽訟之區區又一切自以其身親之統紀不明同歸於亂或者有意於周公之制如近世唐太宗之六典亦庶幾矣而



舉國家之政散於臺省寺監之中以侍中中書令尚
 書令為宰相之職則既政不出於一而又以吏部尚
 書參議之御史大夫參議之秘書監參議之議政者
 何其多也太子詹事同中書門下三品太子太保又
 同中書門下三品者何其濫也政均於人品
 均於官上不足以臨下而下亦無所忌於上交相輕
 而交相忌其中則又有宰相反奉行文書事權迭出
 而奔歸羣有司者西漢之事權歸御史東漢之事權
 歸臺閣唐與宋朝之事權歸諫垣三者本宰相之屬
 也權均勢敵而人主之意方苦之遂至於反奪其權
 然則周家太宰之制至是而三變矣蓋其始也大臣
 自棄其權而不為其中也則貪其權而不擇其所當
 為其卒也則上之人又奪其權而不使之有為為天
 下國家者亦何便於此此太宰之立法而小宰宰夫
 之奉法余之所以不得論也學者蓋因其論而知
 三代之下事權之分合與夫官制之本末源流

太平經國之書卷第五

後學 成德 校訂



<p>太平御覽卷五</p>	<p>...</p>	<p>...</p>	<p>...</p>	<p>...</p>	<p>...</p>	<p>...</p>	<p>...</p>	<p>...</p>	<p>...</p>
---------------	------------	------------	------------	------------	------------	------------	------------	------------	------------

(The reverse side of the page is mostly blank with faint grid lines and some minor stains or marks.)

